

Incumbensa Dürler concernent la coordinaziun entaifer il chantun d'examinaziuns preliminaras e da dumondas

En il rom da dumondas e d'examinaziuns preliminaras tar l'administraziun chantunala, tar las qualas dapli ch'in post da servetsch è involvì, constateschan cunzunt las vischnancas, ma er persunas privatas (resumadas sutvart sco persunas petentas) adina pli savens, che las posiziuns sa cuntradin entaifer il chantun e che la consideraziun dals interess en il rom da l'elavuraziun da las dumondas u dals projects definitivs vegn transferida a la persuna petenta. In exempel actual èn las revisiuns parzialas u totalas da las planisaziuns d'utilisaziun communalas.

En il rom d'ina procedura d'examinaziun preliminar chantunala u da l'examen coordinà d'ina dumonda vegn spetgà ch'il chantun, respectivamain il post spezialisà per quest intent, formuleschia ina posiziun coordinada e fetschia la consideraziun correspundenta dals interess entaifer il chantun. Igl è fitg nuncuntentaivel per la persuna petenta, sche questa incumbensa vegn surlaschada ad ella, perquai ch'ella n'enconuscha betg la valitaziun dals interess tras la Regenza en la procedura d'approvaziun suandanta u dal post spezialisà pertutgà en la procedura da permissiun. Cun la procedura actuala n'èsi betg pussaivel a la persuna petenta d'elavurar sin fundament da l'examinaziun preliminar in project rectificgà che absolve suenter senza cundiziuns la procedura da permissiun u la procedura d'approvaziun. Ils scleriments detagliads cun ils singuls uffizis na pon strusch vegnir prestads ed ina segirezza d'approvaziun definitiva na datti per regla betg.

Pervia da la pratica actuala capiti adina puspè che resalvas vegnan integradas en il rom da la procedura da permissiun u da la procedura d'approvaziun. Talas resalvas pudessan vegnir impedidas cun la procedura d'examinaziun preliminar, tge che manass a bler damain lavur per tut las persunas participadas. Cun ina procedura d'examinaziun preliminar coordinada incl. la consideraziun dals interess e cun ina decisiun da l'examinaziun preliminar lianta da vart da l'administraziun chantunala, pudess vegnir concedida a questa procedura dapli paisa ed a las lavurs respectivas dapli impurtanza.

Las proceduras s'extendan oz per il solit gia sur ina perioda pli lunga. Cun la procedura d'examinaziun preliminar coordinada pudessan ins probablmain scursanir considerablmain il temp che la persuna petenta sto impunder suenter per las lavurs da rectificaziun als projects sco er la procedura d'approvaziun e vegnir dà a la persuna petenta ina resposta lianta.

En quest senn incumbenseschan las sutsegnadras ed ils sutsegnaders la Regenza d'adattar las proceduras d'examinaziun preliminaras en l'administraziun chantunala, cun integrar tut ils posts da servetsch participads uschia, ch'i vegn communitgà en l'avvegnir a la persuna petenta ina decisiun d'examinaziun preliminar coordinada inclusiv ina consideraziun dals interess gia fatga. En quest connex ston resalvas d'approvaziun vegnir preschentadas senza dubi.

Cuira, ils 23 d'avrigl 2024

Dürler, Wieland, Tanner, Adank, Bavier, Berthod, Brandenburger-Caderas, Butzerin, Candrian, Casutt, Collenberg, Cortesi, Della Cà, Derungs (Lumbrein), Favre Accola, Föhn, Gansner, Gort, Haltiner, Hartmann (Schiers), Hefti, Heim, Jochum, Kasper, Koch, Kocher, Kohler, Krättli, Lehner, Loepfe, Lunghi, Luzio, Maissen, Mazzetta, Menghini-Inauen, Metzger, Michael (Donat), Michael (Castasegna), Mittner, Morf, Rauch, Righetti, Roffler, Said Bucher, Sax, Schutz, Sgier, Sigron, Stiffler, Stocker, von Tscharnier, Weber, Wilhelm